

BIBLIOTEKA

E

8JH-1

D 32

SHTETIT

GJIROKASTËR

Faik Deda

Isoja
e kësaj
toke
POEZI

SH-1
032

Faik Deda

Isoja
e kësaj
toke



33288

POEZI

SHTËPIA BOTUESE
«NAIM FRASHËRI»

MOTIVE NGA VENDLINDJA

ÇAST MËNGJESI NË NIVICËT

Flakëritje ngjyrë gjaku përmbi kreshta,
nis zhuzhima e bletëve nëpër hoje;
pikon dritë dita ndër lugje e vreshta,
koha rrjedh këngë në gurgullimë krojesh.

Tek ai plepi i bardhë i fëmijnisë sime,
dy sorkadhe qetuan hapat ndanë ledhit;
buzët e mallit
nga bregu i kujtimeve,
çlodhen mbi degëzat e brirëve të një dreri...

TE PRAGU I SHTËPISË KU LINDA

Pikon e malluar
një heshtje malli.

Prag' i shtëpisë,
kryegëzimi im,
ti që lind pranverën,
o i rrahuri suferina!...

Nga udh' e ngazëllimit
gjer tek psherëtima,
ndiej gjuhën e gurtë
të gurëve të murmë.

Bari i avllisë qeton vallen,
nën pikat e para të një shiu të qetë,
dashuri e shpirtit
pikon mbi gurët me heshtje të blertë.

Prag, o pragu i shtëpisë,
ti, derti

o malli im!...

Bëj të thërras

e, prap' e prap' bie në mendime...

Te shteg' i avllisë

blegërin e blegërin

ai qengji i bukur i fëmijnisë sime...

PEIZAZH

Nata hapi krahët pa kuptuar,
shtigjesh shtyhen lesat qetë-qetë;
hën' e lodhur se ç'po rri menduar,
një kanat të mbyllet dikë pret...

Nis përkunden panjat n'ato ledhe,
qeni i leh hënës plot zemërim;
larg, një culë seç ligjëron me derte,
nga kopeja vjen një blegërimë...

Çlodhen pllajat ngjyer në flori,
gërhet një traktor tej përmbi grykë;
tundet mani i moçmë në avlli,
një kanat u mbyll, u çel një dritë...

U R A

Mbi përroin e thellë
e të lashtë sa gurgullima,
duke tokur prerazi dy brigje,
një urë në vendlindje...

Gurët krejt skalitur
me daltë dhembshuric.

Një nga një të lidhur
gurët në gjerdan —
me gjilpërë pandryshkur
derti për vatan.

Sa herë që marr udhë
se ç'më shfaqet ura.

Kaq shpesh
ajo urë
sado të jem larg.

Ja, ashtu... nga këmbët
fare pak e ngrënë,

E pashlyer në kujtesë,
nga malli — e rëndë.

Një urë në vendlindje.

ETYD MËNGJESI

Tringëllin ndër tinguj,
derdh dritë hap më hap,
çdo jehonë honesh
e tret pa kuptuar.

Tej nga shtegu
fyelli
çeli një kanat,
për atje
dy çape
ç'u nisën nxituar...

F'SHATI IM

Çati të bardha,
nga dielli pragjet,
strehët buz' qershive.

Malet
zbardhur bore,
thinjur lashtësive;
nga përrenj pa numër
pak nga pak të ngrënë.

Një liqen gëzimi supesh,
ndër gjunjë
lum' i vogël i argjendtë.

Ai lumë i fëmijërisë...

Rrallë rrjedh i heshtur,
po gjithnjë më nge...

Çdo gjë krejt e re.
I vjetër veç mulliri
aty te përroi
nën një lug ujëshumë.

Ca rrënjë ftonj,
pakëz zhurmë,
plepa
dhe pareshtur shkumë...

Tej nga lugjet
isoja vjen tretet
mes jehonash mali.

Vija e mullirit —
mërmërimë e përjetshme.
si koha,
si malli.

Nëpër shushurimë bliresh
zëra gazmorë
që zbresin nga zalli.

AKUAREL

Ëmbël-ëmbël bie dyjarja në pyll,
herë-herë që larg dëgjohen blegërima.
...Pa shih, shih:
buz' lehit del një yll
ku manushaqja deh
e trëndelina...

DËSHIRË

Kërkoj mos yllin tim syri ma zë,
pranë shtrungës e vështroja që fëmi;
sa herë marr udhë, pas e ndjell atë
po nuk e di, vallë është' a s'është' ai...

Të shihja yje më ndodhte gjer mesnatës,
me ta hyja bisedë gjith' dhembshuri;
lakmova shpesh ndër duar yjt' e largët,
po vetëm një e mbajta fort në gji...

Dhe ngjitesha ndër male për çdo verë,
majëmalet un' i pata aq zili;
jo mendje për të shitur te të tjerë
po yllin tim ta kapja,
poezi!

TRIMAVE U QESHTE YLLI

NË VATRAT SHQIPTARE

Xhorxh Gordon Bajronit

Ç'mi deshi shpirti dallgët dhe kushtrimin
po, n'ato brigje, pashë vetë krenarinë;
ky gjoksi im nuk reshte nga gufimi
për besën tuaj, nderin, burrërinë...

...Tek ecja buzë mbrëmjes shihja malet,
prej maleve te balli ç'u pikon lavdia;
po ç'qe tërë ai gaz që fshinte hallet,
kur në trapez me ju ngrihej dollia?!...

Nuk keni, mbase, shumë e shumë stolira
përtej kalave, maleve, Aliut,
veç n'ato brigje s'shterej bukuria,
tek frynte me aq mall përreth veriu...

I veshur në një dhomë me oxhak,
me rrobat më të bukura të botës,
tek dal të shoh bedenash rreth e qark —
armët llamburisnin në pasqyrë të Vjosës...

S'u stepet syri shqotave pa fund,
ndonëse për një lule u drithërohet qerpiku;
ç'ish gjith' ai prush që dritë derdhte gjithkund,
kur buzë vatrës ulej edhe miku!...

Përmbi fytyrë ju hiqej shpejt çdo rrudhë,
sikur në jetë të kishit veç gëzime;
ajo e qeshur që gjoksesh niste udhë,
kaq lehtë tretet, vallë, nga zemra ime?!...

Po ç'të harroj më parë nga ai vend,
ku zemrën në mes zemrash pjesë-pjesë e ndava;
pas meje do t'ju ketë ngaherë ndër mend
e mira dhe e shtrenjta vajza ime Alba!...

Mikpritjen tuaj, besën me aq nder —
do t'i kujtoj sa kohë të kem jetë;
e syt' e mi

mbi ty do çlodh ngaherë,
«O nënë e ashpër e burrave të rreptë!»

ELENA GJIKA

Sa i donte këto brigje,
nuk i ndau nga gjoksi kurrë;
tek e kujtonte vendlindjen,
dallg' e mallit merрте udhë...

E vatanit luftëtare,
me një zjarr të parrëfyer;
atë natë gjëmimtare,
t'ia largonte që nga kryet.

...Tek përpiq ato qepalla,
tjetër nur i mirrte balli;
ç'lezete i kishte fjala,
shkrepte çika si stralli...

Ata syt' e saj të bukur,
rrezëllonin ç'kish në xhan;
kur shih kopshtesh ndonjë flutur
malli prap' niste revan...

Nëpër harqe vetëtimash
syr' i saj prapste stuhitë;
kësaj toke çerdhe trimash
ç'i këndonte me gjith' shpirt.

— Motrat, nënat shqiptare,
s'njohin frikë e s'thyhen kurrë;
janë të mbrujtura me halle,
s'ka rrebesh që t'i përgjunjë!

Ç'deli trime në dallgë shqote,
mes betejash+ballylber;
...Kjo penë që vjen prej Shkodre,¹⁾
tulipanë në shpirt më çel!...

1) Më 1881, treqind nxënese shqiptare nga Shkodra, i dërguan Elena Gjیکës (Dora d'Istrias) një penë të argjendtë, punim filigrani i mjeshtreve shkodranë.

SHQIPONJA E SHKREPAVE

Si rrufe që s'ndalet udhës Col Delia¹⁾ kërkon
shpagë,
shqepur hekurat e kullës, flakërimë nëpër flakë...

Sulm' i shqipeve me gjëmë, tymi po përpinte retë,
me vëllezërit njësh u bënë mitrovicasit me
fletë.

Një nga një u lidhën varg shokat²⁾ e brezit në
radhë;
kullës iu qepën përçark geghysenasit më shkallë.

Col Delia krahë-forrë, bubullimë dërrmon
kafazet.
thyen hekurat me dorë, s'ka pengesë ai të
sprapset.

— Ndal, Col, pse s'di të ndaluar?! Të jap pare
dhe ofiqe,

jetën ty ta kam të falur, thujmë ç'do, sa don
çifligje?!

Si furtunë që s'di pengim Coli zien gjoksit llavë,
mareshalit ngjethur drithmë tej dritares i hedh
fjalë.

— Të ka rënë çehre e ligë, mos bëj kot be e
rrufe,
gjersa vdekjen s'kemi frikë, tjetër frikë nuk ka
për ne!...

Ne në sy vdekjen e shohim se lirinë e çmojmë
shumë,
në vatan zemrat i ngrohim, ç'ka se kjo kullë s'i
ngroh kurrë...

Syri ynë s'u drodh njëherë, shpatat tona dritë
ndritin
ne për dritë kemi lerë, për atdhenë vetëm lindim!
...O ju grunjëra mes brigjesh, për ju malli ç'do
më marrë;
vreshta, ledhe edhe shtigje, kodra, lugje behur
bar...

1) Trimi 28 vjeçar Col Delia, nga Tropoja, vërsulet në
kullën e Abdulla Drenit në Gjakovë tok me kryengritë-
sit e tjerë shqiptarë dhe u vë zjarrin fuçive të barutit
tok me municionin, duke djegur në këtë zjarr ministrin
turk, pashallarët dhe krerët feudalë të tradhtisë.

2) shokat — rripa mezi të gjerë që përdoren nga malësorët

Lëngon tërë perandoria, kalbur palca në pushtime,
përmbi kurthe e hordhira ngrihet këng' e tokës
sime!
Plag' e gjak-Shqipëria, synë në dritë, dorën në
kamë,
kali ynë lëshon shkëndija, kal' i tyre është në
grahmë...

Kënga jonë, drithm' e jetë, këto brigje ka jatak,
erë malesh që hynë vetë më çdo ledh e për çdo
prag.
Ç'kanë lezet këto luadhe me aromën që s'e sosin,
bien zile e çokane, lulëkuqet zën' e lozin...

Rrjedhin gurrat ndër çetina, kënga jonë harlis
dhe retë,
një lahutë gëzon luginat, brof një valle si
tërmet...
Kemi një qiell të bukur, sado me diell të
vrërët,
duan malet jetë të lumtur, ndaj strall shkrepin
në thembër...

...Brofi toka arbërore, ra një kullë me rrukullimë;
zjarr' i luftës popullore dogji flakësh tradhtinë.
Mbi një varr gdhendur në gur fryn një këngë tok
me zefirin,

trimëria nuk shter kurrë, ja dhe pushka në dritë
syri...

Geghysenasit me radhë vesën çdo mëngjes ia heqin,
tyta ndryshk të mos marrë, thep e shqekëz t'i
feksin...

Rrasa ka në majë një brimë, mes saj sheh si me
dylbi,
tyt' e pushkës atje hyn, i thonë «rras' e Col Delisë».

Dhënë vendim n'log të kuvendit, pushk' e parë
këtu të zbrazet,
bij' e bija të këtij vendi sot aty provojnë armët.

Gurrat gurgullojnë zallit, hapur grigja nëpër pllaja,
pa u ndalur shqipja e malit i rreh flatrat lart ndër
maja...

TRIMAVE U QESHTE YLLI...

Rrapo Hekalit

Sytë ç'm'i qesh një drit' e bardhë,
mbrëmja tej merr të vaisur;
hop e hop nëpër çdo majë,
trimat xhamadan qëndisur...

Sokëllin Rrapo Hekali,
bejlerët ç'i zu të gjallë;
nga përpjekja tundej mali,
hasmi kokëvarur nën pallë.

As u trembe, as u tunde
Rrapo-rrufe me rropamë;
plumbat të nduknin mbi supe,
ti me supe mbaje maļë!

Klithm' e huaj çirrte shtigjet,
trimave u qeshte ylli;
në të kuq shkëlqenin brigjet
tek nxirrej shpata nga milli...

Prap' buron isua e valë,
puth tarracat gjith' stoli;
rri çdo gjoks-Rrapo Hekalë
dhe çdo sy

sy pushke rri!...

IDRIZ, — LULE TRIMI...

Gjirokastr' e gurtë, e gdhundur-kështjellë,
plumbat mban në futë, valle-fustanellës...

Pushka edhe pena ballin ç'ta qëndisi,
çlodhet te bedenat kapiten Idrizi...

Dita krahët hapi, ajo dit' nëntori;
eh, koh' e satrapit, regjim' i Zogollit.

Shqiptarët si lisa, Ditën e Flamurit,
faqe tradhtisë-s'luan kup' e gjurit.

Turma dertepotë me gjëmim nga shpirti,
kur, një zë i fortë «Poshtë kusarët!» briti.

U drodhën xhandarët, xhandarët e hurit,
pa shkrepni një ballë, ball' i Idriz Gurit...

Ja, me dorë në shpatë, sharpën të përskuqur,
çante me sy lart ai ball' i bukur...

«Kapiten Idrizi, dorëzoje shpatën!»
Fap! ia bëri syri që fekste dhe natën:

— Hiqmu sysh, major, mor gjidi kopuk,
ty me një tabor të ngul mu në furkë!

Zverdhur gjer mbi hundë ti nxiton i dirsur,
jam nga tjetër brumë, jo dhi e gremisur!...

Ç'kroje kam pirë unë, nga ta dish ti,
i hap pallës punë tek vjen gjith' stoli!...

Nuse me pahir që sot të hormis,
ty, o ditënxirë, n'atë botë të nis!

...Zbret serbes nga kali, shpatën vë tek milli;
Idriz-jehonë mali, Idriz-lule trimi...

SEFË KOSHARJA

E kam zemrën kaq të valë,
fërfëro, moj erë, mbi lis...
Këto brigje ç'nur më kanëë,
s'reshtin trimat te ky fis.

Moj Kosovë që s'e ul synë,
më ke bir e të kam nënë!
S'ka të shterur zjarri ynë,
e mëkojnë-o ç'deli këngë...

Prap' do vij tek ti çdo verë,
për t'u çlodhur nëpër hije;
gjoksit zile do më bjerë
malli për këto koriye...

Ndaj dhe të më ndajnë çika,
prap' do ngrihem për vatan;
vallë, i vihen detit prita?!
Shuhet me ujë një vullkan?!

Dhe pa duar, dhe pa këmbë
do t'ia marr shtruar me shokë;
shpatën do mbërthej me dhëmbë,
betohem: «Për këtë tokë!»

BALILO, BALIL NURI...

Nëpër gërxhe për kaq vite
dot s'të zuri vetëtima;
o sorkadh në maj' çdo gryke,
ç'të kish aq lezet martina...

Topçinjtë me topa ta dhanë,
po qepalla ty s't'u dha;
të mori flaka fustanë,
ç'deli nur mbi ballë të ra...

Ndënje te një pllak' e bardhë,
ujë pive nga paguri;
kokën ule dalëngadalë,
pa kuptuar u skuq guri...

Tej, tek lisat në luginë,
rrezet hodhi buz' e mbrëmjes;
ngjyer guri kuqëlimë,
ç'i lëvrinin barit rrëmbat...

Të griu maj' e cfungjisë,
shkëmb a ç'ishe, o Balil?!
Përmbi shpatull e nën sisë
shkrepje prush a gjak të dil?!

Mbi një këngë të trimërisë
ra të çlodhet pakëz palla,
ajo lulja për nën sisë
çeli burbuqe të rralla.

...Ja, nga mendja nuk na hiqet
Balil-nuri ballëdritë,
Balil Nivica me tirqe,
luftëtari sypetrit...

I thosh' nëna zemërzjarr:
— O Balil, ç'mi bëre lotë?
— Pikë-pikë, po aq të valë
i derdhe, moj mëmë, për shokë!

Kaq taborë merr e jep,
s'të gremisën kurrë ty;
ballëgërvishturi në cep,
mu tek vetulla mbi sy...

Supeve flokët të shpleksur,
gjoks' i hapur, gjëmim thellë;
mbrëmja në yje e ndezur
të prehej mbi fustanellë...

Kur nxitoje bregut çapat,
shpata shkreppte rëndë-rëndë;
hyje shpejt nëpër baladat,
që i tirte toka mëmë.

Trokëllin potkoi kalit
si shkrepëtima buz' llohës;
mjaltë rimash ndër balada,
thurje në tezgjah të kohës...

Me atë mallin e birit
priste për çdo darkë Nivica:
Balil Nezha, lule trimi,
more Balil Këndrevica...

...Një pres' shpate gjith' lezet,
përmbi vetull prap' të rri;
në cep buze zë e feks
malli yt për shokëri...

Kur në tokën mëmë u ngule,
e puthe dheun me mall;
në gjoks të rrinin si lule
më shumë plagë se vjec

në ballë!...

MERR TË ÇLODHUR NËPËR VALLE

Heroit të Popullit Ismail Qemali

Ç'mendime mbi vetull heq tek vështron shkëmbin
mbi dallgë?
Dhe mërzisë i vjen keq për t'u ulur n'atë ballë..

Ja, kjo mbrëmje gjith' lezete përmbi Vlorë po zbret
ngadalë,
ti buz' shkëmbit rri mbështete, deti zë e qeton
valën...

Suferinave përditë, udha jote shqot' e dallgë,
kur i mbylle sytë, ullinjtë ç'i tundën degët me
mall...

Pranë ua ndjeve fërfërimën, deshe t'i lëmosh me
duar,
diç fole në mërmërimë larg e buzëpërvëluar!...

— Ky vatan ka peshë të rëndë, sado lehtë që fryn
zefiri,
gjak është larë me deg' e rrënjë, as pëllëmbë të
mos lini!

Po lëshuat dhe një fije, s'ka si gjej prehje në varr,
do më luaj gur' i kokës, çikë-çikë do plas ky
xhan!...

... Ç'do kem mall për këto maja, këto maja ngjyer
borë,
kur zbret mbrëmja përmbi pllaja, ah të ngrihem
t'i vështroj!...

... Vjen sot pamje krejt i thinjur, dritëbardhë vë-
shtron mbi male,
fjala «lodhje» të ngjan hidhur, merr të çlodhur
nëpër valle...

MOTIVE NGA JETA E RE

QYTETI I MINATORËVE TË MEMALIAJT

Faqe diellit dritaret,
e pi gjirin thellë nëntokës;
nga tre anët vetëm male,
në hark Vjose i kreh flokët...

Lufta palcës së nëndheut,
biografi që rrjedh ndër deje;
mademi q'i jep atdheut
prush e dritë për vrull beteje.

Me ballkonet karshi pusesh,
gjelbërim ndër ledhe, kodra;
mbrëmja përskuq lisa, dushqe,
s'njuh veçse mëngjes nëntoka.

Dy binjake-djers' e këngë,
si dhe Vjosa, s'dinë pushim;
një kronik'me peshë të rëndë
dhe për brezat që do vijnë.

Thinjen njerëz po s'ka plakje,
zembrës malit - gjokset male;
nga mëngjeset fshatarake,
nëpër ditë industriale...

ZEMËR E RINUAR

Mbi shpatull mali bardhëron ky fshat,
sa çel dielli synë, çatitë zën' përskuqen;
njëqindesëvjeçar

përditë ecën një plak,
nja katër luftëra i ka hequr supesh.

Mos e mendoni të dremit' mbi zjarr,
mëngjes e mbrëmje e gjen nëpër parcela;
ai që të sjell para historinë e gjallë,
në pikë dimri del të mbjellë pjergulla.

— Djalërinë e shkova kaçak-suferinë,
më tëhu, vumë flamurin në Vlorë;
më ka bërë nishan plumbi mbi brinjë
në dyzetetreshin-korrier në batalion,

Po ndriti dita e bardhë e lirisë,
unë argati iu bëra dheut zot,
mëngët i përvështa krah' rinisë
dhe asnjë çast s'i ula gjer më sot.

T'i rrishë te koka punës, jo vërdallë,
të të pikojë në shpirt dhe për një gjethe,
nuk është' kushedi se ç'trimëri e rrallë,
gjersa kemi frymë e
s'rrojmë veç për vete...

Pata këmbë të lehtë, s'më mbahej hapi,
më hanë gjunjët prap', ndaj ngrihem pa gdhirë;
qysh kur u bëmë Parti
m'u kthye vrapi
e qejfi nuk ma ka zvarrisjen; more bir...

NËNAT

Ndër mote të pagjuma
diçka ju thoshte zemra,
o nëna derteshuma,
ju nëna plagërënda.

S'e mbanin dot as malet,
të thellën dhembje tuaj,
ç'ju zbardhi një lumë hallesh,
ju dukej dita muaj...

Dhe njëqind plagë të merrnim
për ju nuk reshte malli;
kjo botë s'ka mbi refrenin:
«Nënë, o moj nënë xhani!»...

Ky gaz ç'ju ndrin kështu,
o nëna zemërbardha;
kush di t'ia thotë si ju
me ligjet më të rralla!...

Udhëzime të përgjithshme

Udhëzime të përgjithshme për të përdoruesin e kompjuterit. Këto udhëzime janë të nevojshme për të përdoruesin e kompjuterit dhe për të përdoruesin e kompjuterit. Këto udhëzime janë të nevojshme për të përdoruesin e kompjuterit dhe për të përdoruesin e kompjuterit.

Udhëzime të përgjithshme për të përdoruesin e kompjuterit. Këto udhëzime janë të nevojshme për të përdoruesin e kompjuterit dhe për të përdoruesin e kompjuterit. Këto udhëzime janë të nevojshme për të përdoruesin e kompjuterit dhe për të përdoruesin e kompjuterit.

Udhëzime të përgjithshme për të përdoruesin e kompjuterit. Këto udhëzime janë të nevojshme për të përdoruesin e kompjuterit dhe për të përdoruesin e kompjuterit. Këto udhëzime janë të nevojshme për të përdoruesin e kompjuterit dhe për të përdoruesin e kompjuterit.

...ndëshi mbi a një sng vll
: mbremjejeje me...
...i i...
...dritare si...

MBRËMJE PRILLI

Mbrëmje e qetë me hapa nga ndonjë sorkadhe,
me zëra laureshe ulur përmbi gur,
blegërима të lehta ndër brinja e luadhe,
avaz' i bulkthit që netve s'është kurrë...

O qengja, që pa u lodhur hidhi e hidhi,
ju këngë, eh... ç'këngë bilbili gjith' mall
ndërprerë nga isoja e qyqes majë vidhit,
ç'ti përmendësh kësaj mbrëmjeje më parë?!

...Një dritare hapur me pamje nga çairi,
diç presin dy sy të bukur asaj udhe;
nis gërhet traktori në këtë mbrëmje prilli,
po kullosin qetë të lodhur pas pune.

Shushurimë burimesh honit a në shpat
mes zërit të culës nga çobanë të pagjumë;
që larg hingëllima mëzash harrakatë,
o vende të dhembshura,
ç'ju dua kaq shumë!

XX

XX
XX
XX
XX

XX

XX
XX
XX

.....

XX

XX
XX
XX

VËLLAI PO MA VONON NËNËN

Nënë,
më piku malli, nënë;
malli për nënën
e malli i nënës..

Si ai e s'ka tjetër.

Po s'erdhe dot,
në dy gisht letër,
qafomë me atë fjalën

«Bir...»

Ç'të them më tej?!

Nënë, o nënë,
ti më kupton aq mirë!...

LUKOVË

Dheu pi nëpër damarë
ujë që shket mbi çdo pëllëmbë;
firmë rinie mban çdo shkallë,
djersa e saj nëpër çdo rrënjë.

Pa, kur ledhet puth veriu,
mbi çdo gjethe vjen një flutur;
gjoksi të gufon vetiu,
zemra të thotë: — S'ka më bukur!

Dje veç ferra edhe harca,
sot blerimi anë më anë;
këto kodra me tarraca,
amfiteatër gjigant.

S'doli rastësisht në jetë,
s'çau me prehistorinë,
kryearkitekthe vetë —
koha që lindi Partinë.

Rrinë limonë e portokalle
mes lulëzimit «spektatorë»;
ullinjtë ia hedhin një valle,
vallen e rinisë sonë...

NË QYTETIN TIM

Është natë e pastër e qielli pa anë
po fle n' oqeanin e syve ëndërrimtarë.

Rrezja e hënës, mbi këtë truall larë dritë,
përzë nëpër hënë hijet që larg treten;
ajo i vështron me syrin e florinjte
çiftet e vonuar tek i gëzohen jetës.

Në qytetin, tim u mbyll dhe port' e fundit,
i pasmi harrakat u kthye nga takimi.

Oxhaku i fabrikës që larg gjith' nxitim
si gurmaz gjigant gërhet me gulç pareshtur;
avaz' i njëjtë notash basi pa mbarim,
pret e përcjell njerëz të qeshur...

Qyteti fle edhe dremit nga turn' i natës
që nesër dita të jetë edhe m'e bukur.

MOTIVE NGA LUFTA NACIONALÇLIRIMTARE

1. NET GJËMIMESH

Era

retë ia mbledh kruspull motit ngjyrërendë,
tufani kryenëç përmbi bredhâ krekoset;
me bërryla mjegullat i praps tej një nënë,
koll' e saj mbi ledhin e yjeve soset...

Djemt' e popullit gërxheve si sorqedhë,
gjer në sy të gjurit të ftohtit e pinë;
nëna —

iso majave pret edhe përcjell,
yjet larg kanë shumë të mërdhirë...

Nis i paket hënës mes vrapit

prush' i bardhë i zemrave

drit' e verdhë,

ngricën zë ta shkrijë...

MALI U PA NË PASQYRË

Heroinës Bule Naipi

Mbi çatitë vështroi qet',
vështroi kalanë karshi;
dolën sofatesh anetë,
pa e puthnë sy më sy...

Si s'iu drodh ai qerpik,
në zinxhirë, po syrin drejt;
n'ata sy ç'i ra një dritë,
nga litari s'pati dert...

Krojet rënë në mërmërimë,
rrahu shqipja nëpër maja;
ndien kalldrëmet drithërimë,
isua ç'i mbuloi pllajat...

— Do ta marr edhe një këngë
për këtë qytet shkëmbor;
s'tunden trimat të ky vend,
Çelot dhe malet me borë!...

Ja, po ndizet, tej një yll,
Mal' i Gjerë shkrep vetëtima;
dhe kur sytë e mi të mbyll,
prap' do djegë barut vendlindja.

Era ëndrrën ma përkund
gjer ta fitojmë lirinë;
kënga ime nuk ka fund,
Gjirokastër, lamtumirë!

Kalanë dhe një herë vështroi;
iu çel nuri mbi fytyrë;
ballin malit ia drejtoi,
mali u pa në pasqyrë...

Nisi shushurimën zalli
mes rrëkezës që po ikte,
Argjiro mbi lava zjarri,
ç'deli bijë e bija rrite!

MALET KRAH' I KEMI...

— Pse kështu, pareshtur po shkrep nga çdo anë?!
Dy dimra të egër tej tre partizanë...

Zbathur e pa ngrënë, me ditë e me net,
shiu kaq i rëndë, përrenjtë të sertë...

— Gjermani, mizë lisi, dhe me shumë takëme,
bij, të paktë më jini në mes kësaj gjëme...

— Nënë, vetëm s'jemi, shok' e shoqe plot,
malet krah' i kemi, e dhembshur kjo tokë.

Tejepërtej dimrit ne ecim përpara,
të mos flenë fëmijët në qefin të bardhë.

Shkrepace të larta me ty pranë gjithmonë,
na jep vrull çdo hap, nënë, o nëna jonë!...

— Djem, se ç'më gëzuat, zemrën e ndiej valë,
nesër do t'ju zgjoj që me yll të parë...

Hapur kjo kasolle nëpër flakë luftë,
eh, kjo bijë llohe ç'ju rëndon mbi supë!...

BALADA E MULLIXHIUT

Çek-çek, gjith' jetën veç me një çekiç,
guri i mullirit dhe çekiçin griu.
Kush, vallë, paska thënë se jeta është' hiç?
Bloi edhe hekurin mullixhi Haxhiu.

Me miell ngaherë pudrosur i tëri,
si shkum' e elikës shpirt' i tij i bardhë,
kushedi sa gurë të mullirit gdhendi,
kushedi sa iso

mbi prehër i ranë...

Kur thirri atdheu hodhi një pushkë krahut,
ngjeshi gjerdanin fshehur nën tepsin;
pas çdo beteje e mirr malli për vahun,
mendjen edhe flakëve

e kish në mulli.

Barut trazonte e shpesh kujtonte miellin,
i ngrohej dora e i gëzonin sytë,
me vete thoshte: — Mbron baruti diellin
tek del mëngjesit
e mullirin mbush dritë...

...Zbardhi dhe dita e pritur aq shumë,
- pjek mullixhi Haxhiu kulaç në vatër;
mielli mund t'i lagej, bāruti-kurrë,
buzagaz ai, por dhe me-syrin katër!

Në ditët e gushtit, kur i pakej uji,
çëk-çëk çekiçi, një avaz mbi gur.

...Plepi një mbrëmje majën pak përkuli,
iu prenë Haxhiut gjunjët' të vahu mbi ujë...

Vetiu lugu qetoi befas rrjedhën,
ndonëse në vrap s'reshti rrot' e mullirit,
synë e diellit e pa edhe një herë,
çekiçin pranë qasi

e qezallat mbylli...

KUR BIE PËR ATDHEUN

Mos çuditi pse marr këngë,
 më të lehtë sikur ndiej gjoksin;
 dhembja ime s'ka më rëndë,
 po nuk shkon për trimat loti.

Këngën, bir, e kemi ligj,
 më të lerë ç'qajmë pak;
 kush me gjoks i theu armiqtë,
 pas çdo plumbi leu prapë.

Qoft' kur vdesim, qoft' të gjallë
 s'hyjmë të gjithë në këngë dot,
 po mbi këngët gjëndet vallë
 tjetër gjë të rrojë në botë?!

KJO DASHURIA JOTE

1. KUR VIJE TI...

Kur më vije ti te' buzë e fushës,
era loz e loz me shaminë e gushës...

E shkele ngadalë fletën e tërfilit,
me vete rrëmbeve zërin e bilbilit...

Të hutuar zogjtë pyesnin me ciu-ci.
— Buzëqeshin lulebajamet
apo ti?!

Flladi ndali pakëz hovin n'ato vëndë,
ra në byzylykun
e bukurisë tëndë...

2. KJO DASHURIA JOTE

Mbi tokë ka lule me erë e bukuri,
që dielli i puth me gaz e dashuri,
po lulja m'e bukur që më deh me aromë
në çelje petalesh për mua je ti.

Ja, ky trëndafil që mbi gjith' lulet dua,
nga faqja jote e merr ngjyrën hua;
aromë e vesë prej frymës sate merr;
model për petalen ka buzët e tua.

Breze drite vrulltas ngado shtigjet shkrepën,
sa për krahasim s'më lanë kohë të gjej tjetër;
me ty gjoksi im gufon pareshtur mall,
kjo dashuria jote gaz ma mbushi jetën.

3. DETI I FJALËVE DHE PRUSHI I PUNËS

— Kur do vish, moj, as më thua,
shtatlëkundura pahua?
Sonte prap' do mbartim duaj,
ç'të kam bërë që s'vjen me mua?!

...Syri sikur t'u trishtua,
balli yt u zemërua,
buza jote po ankohet,
faqja zjarr të përvëlohet...

— Ke marrë vrap, o mor i shkreft',
nuk i mat fjalët që flat,
pa i nxjerrë ato që the,
unë ta bleva ç'mëndje ke.

— Kot ti mban mëri me mua,
se e di sa shumë të dua;
të këmbej ca fjalë me ty,
s'është' hata a kushedi...

Rrojnë bota sy më sy,
pse kështu për ne të dy?!

— Mirë, mor djal', keq nuk thua
po... këta duaj diç duan.

Vetëm fjalët

kë gëzuan?!

4. AI DË MË VIJË...

Faqe mollësh puth buzë e erës,
degëzat e tyre njom vesë e butë;
çlodhet vajzë e bukur ndanë parcelës,
i rri pjeshka mbi kokë, një kokërr këput...

Gjinjtë e vjeshtës fruta mbushur plot,
po edhe shqetësime sillka vjeshta.
— Ai do më vijë! — zemër e vajzës thotë,
pse aherë

dyshoka kjo pjeshka?!

Thyhet dita ngjyer nëpër mjegull,
syt' e kaltër tutje bëjnë udhë;
u ngrit një gushëkuq, u ul një vetull,
mes një melodie

qeshin dy palë buzë...

5. KTHJELLTËSI

Sa herë, e dashur, nxitoj të vij te ti,
diçka si lutim ndofta ke vënë re...

S'është duke vështruar ata sy!

Kthjelltësin' e zemrës shoh atje,
pastërtinë e shpirtit gjej aty.

ORA

Tik-tak,

ndaj gjithçkaje indiferente,

nuk pyet për ëndrra,

dashuri,

vdekje.

Për një gjë ngaherë e kujdesshme,

tik-tak,

tek në kujton kohën

që ikën e më s'kthehet.

NËNA IME ME SHTATË NURE

Gjersa trima rrit çdo prag,
nga kjo vdekje nuk ndiej rëndë;
veç s'më shkulet një merak,
e kam dert që s'pashë dot nënën.

Çikë-çikë më la fuqia,
plagënjomi më çdo anë;
do më rriten vet' fëmija,
po s'iu ndodha nënës pranë...

Nëna ime kock' e fortë,
hasmin ndien qysh në kufi;
as më lajka, as me top
s'hyn në kurth e s'di beli!

Kush s'e njohu atë nënë,
me hanxharë e me sëpata;
rrudhat i ka ca të rënda.
po nga balli feks dhe nata...

Mban opinga prej lëkure,
nën jelek thik' e hurorë;
nëna ime me shtatë nure
di aq këngë, ç'di t'i këndojë!...

Ja, e ndiej... nëna te porta,
mban tezgjahun e dëgjon,
valles do ia marr me hopa,
syr' i saj sa më gëzon!...

Erdha, nënë! S'më lanë pritë,
dot s'u çmallëm, larg gjithmonë...
Pa për djemtë do m'i rrit
lakra dhe lëpjet' e njomë!...

NJERIU I VOCKËL

Poezia, arti, pallatet, këto male,
kjo dritë që na çel sytë
e skaj pa ndritur s'lë;
turbina, shina, oxhaq, brezare,
nuk mund t'ia bëjnë atij
të qeshur jetën.

Ndonëse s'i mungon gjë,
s'e kënaq asgjë,
ai sheh e dashuron vetëm vetveten.

BILBILI DHE PALLOI

Atje te një ledhë ku rrjedh e rrjedh një krus,
bilbilit iu ndodh pranë papritmas një pallua.

— Ti qenke kaq i vogël, s'ngjakë hiç me mua,
sado që s'i këndon fort këq këngët e tua.

Më shih sa i bukur jam, shihmë edhe thua,
tash që ne u njohëm, të më ngjasësh dua!...

Po lype dy-tri pendë, t'i jap qysh sot hua,
mbase gjej sekretin se si duhet kënduar!...

— Më mirë... ti mba fort ato pendët e tua,
nga borxhi i përfolur, cili u gëzua?!

— Ғundja... t'i fal fare, mos e merr nxituar,
dy-tri pendë më pak nuk ka se ç'më gjen mua...

— Më sëmbon, or mik, ajo... «të më ngjash dua»
e, zërin tim.

nuk e di
e s'ka si ta jap hua!...

ZËRI QË GJËMON

Punëtori Harri Petti në periferi të Çikagos thirri «ndihmën e shpejtë» për gruan e tij shtatzënë, por meqë ai nuk kishte të paguante 42 dollarë në dorë për transportimin e të sëmurës, makina e urgjencës u largua. Pas disa orëve e sëmura vdiq.

Nga shtypi

— Jam zër' i fëmijës që s'erdhi në jetë,
një zë krejt i kobshëm, i mjerë e i ngjirur;
do të doja ta shfreja gjith' dertin vetë
për xhelatët që më gllabëruan qysh pa lindur.

— E njomëza foshnjëz!... U sulën mbi ty,
të mohuan të njohësh nënën, atin tënd...
Ju, njerëz në botë, e ndieni ç'mizori?!
Shpirti na këlthet e gjoksi thellë na dhemb.

...Paskan qetësi nga zëri ynë i mjerë
një grusht prej magnatësh që pijnë gjak njeriu;
klithma jonë — kabanë do gjëmojë përmes tmerrit,
o grua, që mosardhja e foshnjës të përpiu!...

— Unë... ika, Harri im. M'u bë gur krejt gjaku,
nuk e pa diellin foshnja që s'na leu;
po, më thoni, oh, thujmë ti, së paku,
Statuj' e Lirisë

pse s'ngjyhet

ngjyrë dheu?!!

KUR I ZË BESË PABESISË

Për dhelpren dhjetëra fabula janë shkruar,
gjithkush ia njeh vesin, dinakërinë;
si duket, ajo vetë s'i ka mohuar
gjersa udhë nuk ndërron e as e prish terezinë.
Një tjetër histori do t'ju rrëfej,
për dhelpren e veçantë, jo si të tjerat,
kjo s'njeh ves e dredhi, as të gënjejë
e pulat bën sehir dhe hapur po qe dera...

Njëherë u gjend papritur pranë kotecit
dhe, që të ndahej paq, shfaq një mendim:
— Erdha ashtu, kot... Diç në grykë më ngeci
po, që ta njihni mirë ju shpirtin tim,
ja, më lini këtu sonte që të flë,
gjith' natën do bëj rojë, me pulat tok;
do t'ju përgjigjem unë nëse i gjen gjë,
motër jam për to, gjelin e kam shok.

Habitur krejt të zot', i zunë besë.
Si kyçën mirë kotecin u larguan;
ra nat' e errët e hëna me përtesë
që prapa reve shtyhej e menduar...
Pa vrrarë mendjen shumë kjo zonja dhelpër
nisi nga avazi, si zakon e kish;
përtyp një pulë e shtrijë një pulë tjetër,
«Gjersa besë më zunë, do ta bitis...!»

Aty afër mesnate, kur s'desh më,
ngopur barku gjer dhe për mbi mullë
tha: «Tash buzët t'i fshij, gjurmë të mos lë,
ka dhe kufi kjo punë... Do bëj udhë!...»
Po, një grackë tek dil këmbën ia zë fort,
dhe qeni ç'iu vërsul, gati ta ndukë;
«Më lër se... kam flethyrje nga të zot!...»
«Ndofta ke,
po... ke dhe bisht të bukur!...»

NË VETEN TËNDE

Një gjemb shege zgjatej shpesh përmbi një ftua,
pa ç'pa ftoi, një ditë s'iu durua:

— Mos harro se frytin s'e kam marrë hua!

Si të dhëmb në trup

ashtu më dhëmb dhe mua.

BIRI I MALEVE

Heroit të Popullit, Mustafa Matohiti

I.

Cingërimë e ngrica në çdo hon e hap,
zë harbohet era sa shurdhon dhe malin;
shiu gjurmët fshin e fshin çdo çast,
gjer në palcë të ftohtit rreh mbi komisarin...
Marengleni mbrëmjes nxiton nëpër udhë,
i pangrënë e zhveshur në këtë rrebesh;
gjoks' i tij me kollë prapsje s'njohu kurrë,
fry, moj erë, fry nëpër Kurvelesh...
Ç'po rënkojnë strehët nga altet ndër rrugica,
copëzohen katërsh kërcitje bajonete;
gjith' merak sa nëna (eh, nënat!) në deriça,
s'ka të ngopur e ardhmja oshëtima jete.

2.

Një jehonë kënge përmes natës sterrë,
ç'e përcjellin radhaz përrrenjtë shtëg më shtëg;
gurët gishta këmbësh prekin herë-herë,
me këpucët grisur ec e ec ndër net...
Kraçërin kallkani, ky shi s'bën rehat,
brigjet mbytaç sjellin jehona gjëmimi;
shkrofëtima honesh, shungullimë e gjatë,
në mbledhje celule po shkon gjuhëbilbili...

3.

...Sikur lodhet shiu. Muçua prap' në udhë,
sa një bojë njeriu bora, ndien ftohtë mali;
dhembja për të rënët mbi ballë i sajon rrudhë,
atij që tradhtarëve u ra në pres balli.
Lemeri ngërthyer armiqtë duan strofkë,
fundi ngjyer turp i ndjek hije çdo hap;
gjithçka përcëlluar rrafsh me tokën,
digj e pushkato po, isoja jonë më lart!...
Dritësuar bebëzat e nënave në përgjim,
prit edhe përcill Marenglenin mes ngricash;
thellë gjoksesh mbrujtur veç një shqetësim:
— Këtë natë ku ndodhet e ku do ta zerë dita?!

4.

Përkarshi, buz' mbrëmjes
po ecin dy veta,
Ali beu-llagëmesh,
Muçua që nga shkrepat...
Në krah' i lëpihen
beut nja njëzet;
qerpiku s'i dridhet
Muços vet' i tretë.
— Fol, bej, për zullumet
që s't'i lan as deti.
— S'jam kursyer unë,
më njeh tërë mileti...

Ç'i polli bela
beut, leh e leh;
ngrefur pendët mba
si kaposh mbi pleh...
— Unë... veç për atdhe
jetën e kam shkrirë...
— Uli pendët, bej,
zbuloje fytyrën...
Shpirti yt si zgjyra,
duart në gjak-lumë;
bej me dy fytyra,
bej me flamurë shumë!...

5.

Nëpër flakë llufitur çatitë ngjyrë hiri,
po ndër zemra prush' i lirisë kurrë nuk sosi;
buz' me mallin e nënave tek presin birin,
lugu i maleve thith kollë nga lugu i gjoksit...
Gjëmon Gryk' e Kuçit, vetëtin Zareli,
guvat e Nivicës se ç'mbajnë pakëz vesh:
— Si s'u pre një çikëz koll' e Marenglenit?!
Fry, moj erë, fry nëpër Kurvelesh...

...Dhe ecën bilbil Matohiti kokëlartë,
lugjeve, ndër brinja, i paankuari një herë;
në Delvinë mëngjesi, drejt Beratit në darkë,
zemërhekur ai, ndonëse gjoksi i ther thellë...

Ja Qaf' e Gërxxhunit tek ngjit të përpjetës
me një halë në lugth, po i prerë për trimëri;
ai që s'njohu prapsje qoft' edhe një çast të vetëm
nëpër vapën saç a buz' shirash me furi.

MALLI I SELAM MUSA SALARISË

nga kënga e fundit e heroit

Ç'kam një mall e s'e them dot, më piku për ato
stane,
të pi me grusht ujë të ftohtë, të vë kokën mbi
llabane...

Memë Sherifi shumë më do, ç'm'u puth ylli që në
fshat,
po dhe unë, Memë biro, në flakë e mbi tela bashkë...
Qysh do durojë shpirti im për ato bigat në rreshta,
një çokane trokëllin për luadhe, lugje, vreshta...
Ato biga që vërsulnim, kam sevda prap' t'i ngrë,
këto duar qysh i shkulnin, mall i maleve më zë...

Ai mall që merr dhe gurët se ç'pikon që thellë në
shkëmb,
malli ynë thanë edhe drurët, pikë-pikë pikon e
dhemb...

Eh, kjo erë që nga malet ç'po më hyn kështu ndër
dej;

hoqe, Memë, dhe ti kaq halle, lis i lartë lastarë do
lejë...

Mosh' e thyer, Memë, o bir, po një herë kam
derdhur lot,

tek ulliri me bërryl, ah ç'm'u vra një cmokthinjot...

Ish një ditë më të aguar, në gjoks plumbi ç'ma
goditi,

buz' e malit u kuqua, ylli sipër majës ndriti...

Për të parë shokët kaq herë nëpër gjyle qysh më
futej?!

Predhë, plumb a çfarë të qe, veç me gjoks i prapste
tutje...

Ball' i bëri një duzine, kur jip frymë më çoi fjalë:

— Prapa s'bëra një thërrime, të m'i thoni xha
Selamit!...

Dy pik' loti rrukullimë nuk i mbajti dot Selami,
tejetej një thikë në brinjë, un' e di se ç'm'u dogj
xhani!...

Po ti, Memë, ç'ke në gjoks? Pse e mugullove ballë?!

...Ngrema edhe pakëz koken, mos e cëno xha
Selamë...

Pike buzën se je burrë, në më do aq sa të dua,
hoqëm tok rreziqe shumë po s'i kemi lotët sua!

...Më kujtohet kur një natë zbritëm lodhur te
luadhi,
zjarret ndezur përmbi fshat, ishte prill, ball' i
beharit...

Na kish zënë hasmi pusi nëpër pyll afër një stani,
me ca 'djem festen mbi sy, çape-gjatë dhe xha
Selami...

Frrap! me vetull shkrepën çika ata çaçkënët stanarë,
ca me hunj e ca me thika, që të gjithë dyfeqelarë...

Ball' i bënin çdo të lige djemt e mi, o ç'djem
levendë,
po mbi ta një djalë Nivice, kapedan që kur kish
lerë.

Gjithnjë krahut dy dyfeqe, sa e pyesje flit serbes:
— Një për shokë e një për vete, do t'i mba gjersa
të vdes!

U zu lufta përmbi majë, pall' e tij veç pre e gri,
ç'i mori plumbi gurmazë, zemërborë si ai...

...Kur do marrim, o Memë, bashkë një sy gjumë te
der' e stanit,
kopenë të shkulum pas vape, të hanë majëzat e
barit...

Çikë-çikë po zbardh mëngjesi, ja... i ftohën alitrikat,
prap' në darkë do t'i ndezin, sa t'u thahet fare
gryka!...

Ato drita që nga deti s'na i ndanë një çast ata,
nëpër natën që s'u feksi, sharkut tim iu bënë bela...
Gjysm' e sharkut mori flakë, gjysma m'u rop nëpër
tela,
nisi deti gjylet prap', na i bënë ullinjtë thela...

Pa për djemtë dinë të ruhen, u bën mali shenjë me
kokë,
ky pepinua që më mburret, ç'do i marrë trutë në
torbë!...

Nëpër det do hanë shoshoqin, te ky breg me turp
do ngjyhen.

...Ç'ka Kanina që s'derdh topin? Mos m'u janë
sosur gjylet?!

Dinë të ruhen djemt' e mi, le t'u bëhet copa guna,
hasmi erdhi lukuni, po stralli... s'qas-shushunja!
Syri mjegull më ka marrë, ah ky tym ç'm'u bë
bela!

...S'po më vjell Kanina zjarr, çoç do kenë, çokush
m'u vra...

T'u jet' sosur gjith baruti? Mos ia ftohin grykën
vallë?!

Vështro, Memë, ku shkoka plumbi, me dylbi do na
kenë parë...

Mos e dridh buzën, o Memë, se më shumë do më
pikë xhani,

shihmi djemtë sa më mbenë, thujmu: — Rron xha
Selami!
...Ç'është' i mirë për në vërri ky qershor me gjethe
shumë,
plumbat i bëjnë veri, po... ky tym ia prishi nurë...
Më ra gjaku mbi këmishë, ballazi me gjeneralë,
plumbi më ka marrë në sisë, po ia kam lavosur
ballë.
Gjunjët vrapi m'i ka ngrënë që në Gribë e në
Labovë,
po do rrojmë prap' në këngë, në davete do
këndojmë...

Nëpër iso buz' stralli këta trima prap' do vijnë,
do vijnë djemt' e xha Selamit, që përgjunjje gjëkund
s'dinë.
...Hesht!... S'më ha baruti mua, se jam rritur në
mes llohës,
veç një plagë prap' m'u lëndua, eh, është' plumbi
i Labovës.
Këto brigje si behar dëgjo ç'ligjërimë ka pylli,
rrinë male, kodra radhë, te ky vend ç'të ngopet
syri...
Netve një mall' i rëndë ç'do më pikë për
Salarinë,
në erë të shtrungës të flë, t'i heq udhë kopesë në
brinjë...

Ndiej merak për një longar, e kam varur te një bli,
kam një nipçe, deli djalë, do ta gjejë, kushedi...
Për malet t'ia thotë çdo ditë, që llamburisin nga
bora;

dyfeku s'më njohu ndryshk dhe në borë nën
shark e ngroha...

Ndaj çdo atdhetar ngaherë nipçja me shokë t'i
kujtojnë,

kur longarit të m'i bjerë, Këndrevicën të vështrojë...
Ç'kanë lezet, ç'më pikon shpirti, n'ato lugje prap'
do vemi,

amanet, o Memë Sherifi, Salarisë të falat shpjemi!...
Mbeçë mirë... Këngës ia shtro, vumë dhe dorën
përmbi ballë,

pikë loti mos loto! Hakën mos ma le pa marrë!

Ah, s'më iket... Se kjo kockë me strallë është e
gatuar,
merre pagurin nën kokë, njomëm buzën e
shkrumbuar.

O ju djemt' e mi gaztorë, që nishan merrni aq
mirë,
ju që s'ma lëshoni Vlorën, gjylet i shtyni me
brinjë.

Dhe të fortë e dhe të bukur si këto vende stralli,
mos më mbetë nishan e pluhur, po më shteri për
ju malli!

Malli im nuk ka të sosur, o moj Vlora buzë deti,
të kam pranë e s'kam të ngopur, buzë shkëmbit,
ball' lezeti.

Telat i bëra dërrmile të vështroj valët e tua,
po më futën në mendime ca pamporë... tjetër sua...

Tek ky prag nuk mbahet mend armët ne t'i
hedhim sheshit,
ju, pamporë, dhoga u rëntë, ua thëntë mu në rrëz'
të veshit!

...Shih, o Memë, prap' ia nisën djemt' e mi
gjëmimmëdhenj.

— Hajde, djema, atë iso mu në gjoks do ta
mbërthej.

Pa Selamë do ketë nga mot nëpër shkrepë dritëlara,
dhe të mençur, dhe të zot, do bëjnë gjithnjë
përpara...

PËRMBAJTJA

MOTIVE NGA VENDLINDJA

Çast mëngjesi në Nivicë	3
Te pragu i shtëpisë ku linda	4
Peizazh	6
Ura	7
Etyd mëngjesi	9
Fshati im	10
Akuarel	12
Dëshirë	13

TRIMAVE U QESHTE YLLI

Në vatrat shqiptare	14
Elena Gjika	16
Shqiponja e shkrepave	18
Trimave u qeshte ylli... ..	22
Idriz, lule trimi... ..	24
Sefë Kosharja	26
Balilo, Balil nuri... ..	28
Merr të çlodhur nëpër valle	32

MOTIVE NGA JETA E RE

Qyteti i minatorëve të Memaliajt	34
Zemër e rinuar	36

Nënat	38
Mbrëmje prilli	40
Vëllai po ma vonon nënën	42
Lukovë	43
Në qytetin tim	45

MOTIVE NGA LUFTA NACIONALÇLIRIMTARE

Net gjëmimesh	46
Mali u pa në pasqyrë	47
Malet krah' i kemi... ..	49
Balada e mullixhiut	51
Kur bie për atdheun	53

KJO DASHURIA JOTE

1. Kur vije ti... ..	54
2. Kjo dashuria jote	55
3. Deti i fjalëve dhe prushi i punës	56
4. Ai do më vijë... ..	58
5. Kthjelltësi	59

Ora	60
Nëna ime me shtatë nure	61
Njeriu i vockël	63
Bilbili dhe palloi	64
Zëri që gjëmon	66
Kur i zë besë pabesisë	68
Në veten tënde	70
Biri i maleve	71
Malli i Selam Musa Salarisë	75